

आकाशवाणी

खास-खास खबरां:-

- स्लोवाकिया नै प्रधानमंत्री नरेन्द्र मोदी होरें'गी मुख्य दे सर्वोच्च नागरिक सम्मान कन्नै सम्मानित कीता।
- प्रधानमंत्री नरेन्द्र मोदी होर अज्ज फ्रांस च जी-7 शिखर सम्मेलन च हिस्सा लैडन।
- सरकारै अपनी नमीं समीक्षा च डीजल ते विमानन टरबाइन ईंधन दे निर्यात पर खास बाद्दू उत्पाद शुल्क च बाद्दा कीता।
- तरल कुदरती गैस LNG वाहक टैंकर दिशा नै होर्मुज जल डमरु मध्य गी सुरक्षित तौर पर पार करी लैता ऐ।
- अमरीका च दक्खणी कैलिफोर्निया दे मोजाबै स्थित अमरीकी वायू सेना दे अड्डे थमां डोआरी भरने मगरा बम्बारी करने आहला B-52 जहाज हादसे दा शिकार- सोआर सारे 8एं लोके दी मौत।
- FIFA विश्व कप 2026 च बड़्डा उलटफेर होआ। काबोवर्डे ते स्पेन बश्कार मैच Draw रेया। तौआई Belgium ते मिस्र बश्कार होए दा मैच बी Draw रेआ।

<><><><><><>

PM- Slovakia Honour

स्लोवाकिया दे राष्ट्रपति पीटर पेलेग्रिनी होरे प्रधानमंत्री नरेन्द्र मोदी होरें'गी मुख्य दे सर्वोच्च नागरिक सम्मान "ऑर्डर ऑफ द व्हाइ डबल क्रॉस फसर्ट क्लास" कन्नै सम्मानित कीता ऐ। सम्मान स्वीकार करदे होई मोदी होरें स्लोवाकिया दी सरकार ते उत्थुआं दे लोके दा आभार जताया। उ'नें आखेआ जे एह सम्मान भारत दे 140 करोड़ लोके ते भारत-स्लोवाकिया दी मजबूत दोस्ती गी समर्पित ऐ। प्रधानमंत्री होरें आखेआ जे एह सम्मान दोने मुखे बश्कार बसाह-भरोसा/ प्यार ते सहयोग दा प्रतीक ऐ ते औने आहली पीढ़िये गी इस दोस्ती गी होर मजबूत करने आस्तै प्रेरित करोग।

<><><><><><>

PM- Slovakia

प्रधानमंत्री नरेन्द्र मोदी अज्ज ब्राटीस्लावा थमां स्लोवाक गणतंत्र दे दौरे दे समापन मगरा एविया फ्रांस पुज्जी जाडन। प्रधानमंत्री हुंदे ब्राटिस्लावा दौरे दौरान भारत-स्लोवाकिया सरबंध बेहतर करने आहले केई ऐतिहिसक फैसले लैते गे। प्रधानमंत्री मोदी हुंदे आसेया कल 11एं समझौतें पत्रें पर दस्तख्त कीते गे। एह समझौते रक्षा- नागरिक-परमाणु-ऊर्जा- सैलसफा अज्जै-कल्लै आहली तकनीकें जियां Quantum संचार आर्टिफिशियल Intelligence ते उच्च शिक्षा दे खेत्रें च दबक्खी सहयोग मजबूत करडन।

प्रधानमंत्री नरेन्द्र मोदी ते स्लोवाक प्रधानमंत्री Robert फिको हुंदी गल्लबात दौरान दौनें धई आतंकवाद पर काबू पाने लेई सहयोग तगड़ा करने आस्तै- इक सांझा कार्यकारी गुप खडेरनें दा बी फैसला कीता।

<><><><><><>

PM G-7

प्रधानमंत्री नरेन्द्र मोदी दंऊ मुल्खें दे अपने दौरे दे त्रिएं चरण तैहत जी-7 शिखर सम्मेलन च हिस्सा लैने लेई अपने दंऊ दिनें दे दौरे लेई फ्रांस दे एविया शैहर पुजडन। उंदी आमद पर फ्रांसिसि राष्ट्रपति इमैनुएल मैक्रों औपचारिक तौर पर प्रधानमंत्री हुंदा सोआगत करडन। प्रधानमंत्री मोदी होर ओहदे मगरा जी-7 मुल्खें- भ्याल मुल्खें ते विश्व बैंक ते अफ्रीकी विकास बैंक दे प्रतिनिधियें कन्नै शिखर सम्मेलन दे कार्यकारी सत्र च शिरकत करडन- जेहदा विशे सार ऐ- नमीं भ्याली दी तांग ते अंतराष्ट्रीय एकेs दा पुर्ननिर्मान। मीटिंग दे बाहरे प्रधानमंत्री कनाडा दे प्रधानमंत्री मार्क कार्ने- बरतानिया दे प्रधानमंत्री Kier Starmer ते संयुक्त अरब अमीरात दे राष्ट्रपति शेख मोहम्मद बिन ज़ायेद अल नाहयान हुंदे कन्नै बी दबक्खिया गल्लबात करडन। मगरा प्रधानमंत्री फ्रांसिसि राष्ट्रपति इमैनुएल मैक्रों हुंदी मेजबानी च दिती जाने आहली रातीं आहली धामै च हिस्सा लैगंन।

<><><><><><>

Govt. SAED Hike

सरकार नै अपनी नवीनतम समीक्षा च डीजल ते विमानन टरबाइन ईंधन -ATF दे निर्यात पर खास बाददू उत्पाद शुल्क SAED च बाददा कीता ऐ। डीजल पर निर्यात शुल्क 13 रपे 5 पैसे फीह लीटर थमां बढिए 14 रपे फीह लीटर करी दिता गेआ ऐ। एह बाददा अज्जै थमां लागू होई गेआ ऐ। पेट्रोल पर निर्यात शुल्क च कोई बदलाव नैई कीता गेआ ऐ। घरेलू उपभोक्ता आस्तै पेट्रोल ते डीजल पर मौजूदा शुल्क दरे च कोई बदलाव नैई कीता गेआ ऐ। पश्चिम एशिया च जारी संकट दे चलदे पेट्रोलियम उत्पादें दी लोड़चदी घरेलु उपलब्धता यकीनी करने आस्तै केन्द्र दे जारी जतनें दे चलदे शुल्क च संशोधन कीता गेआ ऐ। सरकार नै विदेशी शिपमेंट गी घट्ट करने ते घरेलु बजार च आपूर्ति गी तरजीह देने आस्तै 27 मार्च थमां पेट्रोलियम उत्पादें पर निर्यात शुल्क लागू कीता हा।

<><><><><><>

LNG- Carrier Disha

तरल कुदरती गैस LNG वाहक टैंकर दिशा नै होर्मुज डमरु मध्य गी सुरक्षित तौर पर पार करी लैता ऐ। पश्चिमी एशिया पर युद्ध शुरु होने मगरा इस समुन्द्री रस्ते गी पार करने आहला एह पैहला भारतीय LNG टैंकर ऐ। इस टैंकर च 62 ज्हार 370 मीट्रिक टन LNG ऐ ते भारतीय शिपिंग निगम दे तैहत एदा प्रबंधन कीता जंदा ऐ। अमरीका ते ईरान बश्कार शुरुआती युद्ध विराम समझौते दी घोषणा दे मगरा एह होर्मुज जल डमरु मध्य गी पार करने आहले वाणिज्यिक ज्हाजें चा इक ऐ। पतन पोत परिवहन ते जल मार्ग मंत्रालय दे निदेशक उपेश कुमार शर्मा होरें दस्सेआ जे इस ज्हाज दे 18 जून तगर गुजरात दे रहेज पतन पर पुज्जने दी मेद ऐ। उ'नें दस्सेआ जे अजें तगर भारतीय झंडे आहले 10 ते विदेशी झंडे आहले 5 ज्हाज इस रस्ते गी सुरक्षित पार करी चुके दे न।

<><><><><><>

US-B52 Bomber Crash

अमरीका च दक्खनी कैलिफोर्निया दे मोजावे स्थित अमरीकी वायू सेना दे अड्डे थमां डोआरी भरने मगरा इक बम्बारी करने आहला B-52 जहाज राती हादसे दा शिकार होई गेआ जेदे च सोआर 8 लोके दी मोत होई गई। सोशल मीडिया पर अमरीकी सेना नै दस्सेआ जे एडवर्ड्स वायू सेना अड्डे पर मुकामी समें मूजब बड्डलै लगभग 11 बज्जिएं 20 मिन्टें पर जहाज दे हादसे दा शिकार होने दी खबर थहोई- जेदे मगरा आपातकालीन दल मौके पर पुज्जी गेआ। एदे मगरा हवाई अड्डे गी बंद करी दिता गेआ ते औने आहले जहाजें दा रस्ता बदली दिता गेआ। इस दौरान हवाई अड्डे दे सारे गैर व्यवसायिक Visitor Pass निलंबित करी दिते गे न। हादसे दी वजह अजे तगर साफ नैई होई सकी ऐ।

<><><><><><>

UNSC Resolution Afghanistan

संयुक्त राष्ट्र सुरक्षा परिषद नै कल सब्बनै दी सहमती कन्नै इक प्रस्ताव पारित कीता ऐ जेदे च अफगानिस्तान दे तालिबान शासकें थमां महिलाएं पर होआ रदी कारवाई गी फौरी तौर पर रोकने ते अफगानिस्तान दे अंदर बक्ख-बक्ख गुटें कन्नै निबड़ने दा आहवान कीता गेआ ऐ। प्रस्ताव दे तैहत अफगानिस्तान च संयुक्त राष्ट्र दे राजनीतिक मिशन दा कार्यकाल अगले बरे 17 जून तगर बढ़ाया गेआ ऐ ते मिशन गी मानवीय सहायता पजाने ते बिजन कुसै फर्को-फर्की दे राष्ट्रीय ते मुकामी शासन गी बढ़ावा देने दा अधिकारी दिता गेआ ऐ।

इस महीनै अफगानिस्तान दे पश्चिमी शहर हेरात च तालिबान दे सख्त ड्रेस कोड दा कथित तौर पर उल्लंघन करने दे आरोप च 30 महिलाएं दी गिरफ्तारी दे बाद एह प्रस्ताव पारित कीता गेआ।

<><><><><><>

UPSC Civil Service

संघ लोक सेवा आयोग नै इस बरे दे सिविल सेवा प्रारंभिक परीक्षा दे नतीजें घोषित करी दिते न। आयोग नै दस्सेआ ऐ जे इक जहार थमां मती खाली पेदी असामियें आस्तै 13 जहार थमां मते मेदवारें दी सिविल सेवा मुख्य इम्तहान लेई ताल कीती गई ऐ।

UPSE नै मेदवारें गी एह बी दस्सेआ ऐ जे उन्दे नम्बर- कट ऑफ अंक ते उत्तरी सूचि खीरी नतीजें घोषित होने मगरा आयोग दी वेबसाईट पर अपलोड कीती जाहग। मेदवार UPSE दी आधिकारिक वेबसाईट upsc.gov.in थमां प्रारम्भिक परीक्षा नतीजें डाउलोड करी सकदे न। आयोग नै आखेआ ऐ जे पिच्छले बरे इक जहार 87 खाली असामियें हियां ते मुक्ख परीक्षा लेई 14 जहार थमां मते मेदवारें दी ताल कीती गेदी ही।

<><><><><><>

FIFA World Cup

फिफा विश्व कप 2026 च बड्डा उलटफेर होआ ऐ। पैहली बारी विश्व कप खेड्डा रदी काबो वर्डे दी टीम नै प्रबल दावेदार स्पेन गी 0-0 कन्नै बराबरी पर रोकी दिता। काबो वर्डे दे 40 बरे दे गोल कीपर वो जिन्हा नै शानदार खेड्डा दा प्रदर्शन कीता ते स्पेन गी गोल करने दा कोई मौक नैई दिता। काबो वर्डे करीब 5 लक्ख अबादी आहला लौहका नेहा मुल्ख ऐ। इस नतीजें गी हून तगर प्रतियोगिता दा सब्बनै थमां बड्डा उलटफेर मन्नेआ जा'रदा । बरे 2010 दी विश्व चैम्पियन स्पेन दुई बारी खिताब जितने दे लक्ष्य कन्नै इस प्रतियोगिता च उत्तरी ऐ। हालांकि स्पेने दे कोच लुइस द ला होरें पैहले गै आखेआ हा जे काबो वर्डे इस विश्व कप दी सब्बनै थमां मती हैरान करने आहली टीमे चा इक साबित होई सकदी ऐ। इस्सै थमां पैहले वेल्जियम ते मिस्र बश्कार खेड्डेआ गेदा मैच 1-1 गोल कन्नै रेआ। मिस्र विश्व कप च अपनी पैहली जित दे कोल पुज्जी गेदा हा पर बेल्जियम दे शानदार खेड्डा नै उने'गी निराश करी दिता।

<><><><><><>

Weather

मौसम विभाग नै अरणाचल प्रदेश- असम-मेघालय- बिहार- माहे- पच्छिम बंगाल दे तराई क्षेत्र- सिक्किम- तमिलनाडू- पुदुचेरी ते कराईकल दे किश हिस्सें च अज्ज मौलाधार बरखा पौने दी संभावना जाहिर कीती ऐ।

विभाग नै दिल्ली- हरियाणा- चंडीगढ़- अंडमान ते निकोबार द्वीप समूह- छत्तीसगढ़-आंतरिक कर्नाटक ते लद्दाख दी किश थाहरें पर बिजली मिलकने ते तेज हवा चलने दी संभावना जाहिर कीती ऐ। झारखंड- कोंकण- गोवा- मध्य प्रदेश-महाराष्ट्र- ओडिशा- पंजाब- तमिलनाडू- पुद्दुचेरी ते कराईकल- तेलंगाना- पच्छिम बंगाल ते सिक्किम च बी इस्सै चाली दा मौसम बने रौहने दी संभावना ऐ। मौसम विभाग मुजब पश्चिमी राजस्थान च अज्ज गरज कन्नै तेज हवा चलने दी संभावना ऐ। इस दौरान तेलंगाना ते विदर्भ दे किश हिस्सैं च दिन भर लू चलने दी संभावना ऐ। गोवा- मध्य महाराष्ट्र- मराठवाड़ा ते ओडिशा दे किश हिस्सैं च अज्ज गर्म ते गुम्में आहला मौसम बने रौहने दी संभावना ऐ।

<><><><><><>